

申端愍公文集



申端愍公文集

申佳胤 著

中華書局

叢書集成初編

申端愍公文集

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五

此據畿輔叢書本
排印初編各叢書
僅有此本

申端愍公集目錄

卷首

聖諭

諭祭文

褒錄幽忠以勵臣節疏

敬陳所聞以備諮察疏

幽忠可愍伏乞聖恩卹錄疏

懇乞儀卹以普皇仁疏

錄遺以助風化疏

禮部覆疏

祭田帖文

卷一 奏議

詳陳先著第一議

詳陳先著第二議

申端愍公集 目錄

魏裔介

王崇簡

周體觀

張王治

魏裔介

詳陳先著第三議

詳陳先著第四議

陳母節疏

挑外河疏

卷二 記 傳 序 行狀 跋

新建廣濟閘碑記

臨洛驛馬政記

侯生傳

永年縣志序

讀史摘要序

鄭儀之制藝序

和九齋新藝自序

孔氏家志後序

贈文林郎杞縣知縣先考阜岩府君行狀

申氏家譜跋

卷末

明史本傳

申節愍公傳

年譜

行狀

欽賜祭田記

申端愍公祀田記

杞縣重建邑侯申端愍公祠堂碑

華亭陳子龍

雞澤殷岳

溧陽馬世俊

新安余維祺

杞縣丁敬

內三院於順治九年十一月十七日辰時恭奉聖諭明末寇陷都城君死社稷當時文武諸臣中豈無一二殉君死難者幽忠難泯大節可風著禮部會同院部等衙門堂上官詳察確訪死節職名並實蹟具奏勿遺勿濫內三院卽行傳知

維順治十三年閏五月初二日皇帝遣禮部右侍郎兼內翰林國史院學士李曉棠諭祭故明太僕寺寺丞申佳允之靈曰烈士成仁齎志而沒忠臣報國捐軀以從爾申佳允居心忠孝秉性端良值逆寇之憑陵能舍生而取義朕追思往蹟宜表忠魂特崇祀易名用垂不朽靈其不昧尙克欽承吏科右給事中臣魏裔介題爲褒錄幽忠實聖朝之曠典謹舉平日所聞仰塵聖聽乞發該衙門再加體訪以勵臣節事臣聞運遇昇平則良臣奏績時逢板蕩則烈士厲心故有刎頸血裾而酬解衣之遇焚身湛族以報國士之知勁草疾風表貞心於歲晚成仁取義礪砥柱於波流雖慷慨從容不必一致要皆負乾坤之正氣與日月而爭光是以上代之君莫不旌表忠魂崇重節義昔武王入商封比干之墓明祖定鼎建余闕之祠夫比干乃殷室之孤臣余闕實有元之義士然而一帝一王他務未遑首先嘉尙者誠以維持風化振勵紀綱俾一代之臣子知所軌範也自明政失馭寇焰滔天龍聳飲恨於鼎湖坤配遺絃於椒殿君死社稷臣罹凶災誠致命遂志肝膽塗地之秋也一時在京諸臣雖不能策馬揮戈如瞻尙之死於縣竹力疾苦戰若卞壺之死於青溪然亦有仗節君前橫屍闕下金石可勒其貞松筠不改其色摧蘭蕙於一朝流芳聲於千載斯誠上帝之所矜憫聖朝之所

嘉歎者也。伏惟我皇上受天之命，奄有方夏。凡所設施，皆足駕軼前代，爲憲後昆。而昨奉上傳聞，揚明季之遺忠，振發幽冥之生氣，尤爲化導之先資，敦勵之大典。方之周武王、明太祖，不約而同符矣。以臣所聞，當年寇破都城，殉難而死者，閤部卿寺，則有大學士范景文、左都御史李邦華、戶部尚書倪元璐、兵部右侍郎王家彥、刑部侍郎孟兆祥、副都御史施邦耀、大理寺卿凌義渠、太僕寺寺丞申佳允、詞林臺省，則有翰林院左諭德周鳳翔、右諭德劉理順、宮允馬世奇、簡討汪偉、吏科都給事中吳甘來、御史王章、陳純德、陳良謨、部屬新進，則有吏部員外許直、兵部郎中成德、戶部郎中周之茂、兵部主事金鉉、中書舍人宋天顯、進士孟章、明順天府推官劉有潤、勳戚中，則有新樂侯劉文炳、惠安伯張慶臻、宣城伯衛時春、駙馬都尉鞏永固、東宮侍衛周鏡、司禮監內臣王之心、斯皆一時殉難之臣，彰明較著者也。伏乞皇上將臣所奏，發下該衙門，再行查訪實蹟，或實之故老之傳聞，或考之同鄉之公揭，訛者正之，遺者補之，儻體訪既明，卽行題請，宜付史館，浩氣長留於汗青，配諸鄉賢，芳聲永薦於俎豆，庶積靈未泯，將宜力於興朝，頑嚚可風，亦儀型於來觀矣。臣不勝云云。

奉聖旨著詳訪確查具奏。禮部知道。

內翰林宏文院侍讀學士臣王崇簡奏，爲敬陳所聞，以備諮察事。臣捧讀內院恭奉聖諭云云，欽此。仰見我皇上堯舜之德，嘉意作忠，雖異代之臣，猶惓惓於懷。臣既有聞於昔日，敢不伸陳於聖時。臣都人也，都城破日，臣以本生母故，營葬城外，潛伏草土，得聞文武殉難者，如東閣大學士范景文、卽

時投井。兵部右侍郎協理戎政王家彥、守德勝門被殺。刑部侍郎孟兆祥、守正陽門死於城下。其子進士孟章明、同妻王氏、縊於其寓。左中允劉理順、妻妾子女家人、闔門死者十二人。河南道御史王章、巡門城上、罵賊被殺。兵部車駕司主事金鉉、巡視皇城、投身御河。母張氏、妾王氏、弟生員金鏞、俱投井死。兵部武庫司主事成德自刎。其母妻妹俱自縊。戶部尚書倪元璐、左都御史李邦華、副都御史施邦耀、大理寺卿凌義渠、左春坊左庶子周鳳翔、左諭德馬世奇、太僕寺寺丞申佳允、戶科都給事中吳甘來、福建道御史陳純德、文選司員外許直、皆自盡。簡討汪偉、與妻耿氏同縊。四川道御史陳良謨、自縊。妾時氏同死。惠安伯張慶臻、闔門自焚。駙馬都尉鞏永固、自焚其室。刎於火中。凡此諸臣、皆一時殉難之烈烈者。考其平生、非彈閹寺、百折不回、卽正直立朝、忠貞夙著、惟其生時犯顏敢諫、所以臨危授命不移。忠魂渺渺、埋沒無聞。恭逢聖朝、鑒及幽冥。臣竊爲諸臣幸之。謹述所聞之最確者如此。此外尙有威臣焚縊而死、以及隱忍一時、終於盡命者。迨夫宦官庶女、世職膏衿、忠憤盡節者。其人雖微、其死同烈。所宜博諮、以仰副聖明勿遺之至意。至於逆闖入關、渡河時、長安縣知縣吳從義、投井死。山西巡撫蔡懋德、大同巡撫衛景燾、宣府巡撫朱之愚、皆自縊。甯武總兵周遇吉、與賊大戰死。其捐軀殉難、忠烈皆同。乞賜並察、以廣作忠之典。若彼誤國擁貲、掠擄而死者、所當嚴覈、以仰遵皇上勿濫之諭者也。臣感逢聖主、謹陳所聞、以備諮詢。字稍踈限、仰乞聖恩、矜宥。臣不勝云云。

奉聖旨。著詳訪確察具奏。禮部知道。

戶科給事中臣周體觀謹奏。爲特舉之曠典宜嚴。旣核之幽忠可愍。伏乞聖恩卹錄。以光信史事。竊惟湯有天下。顯忠遂良。武王克商。式閭封墓。載在典冊。君臣交美。恭逢我皇上追比湯武。嘉與忠烈。特發上傳。察訪明季殉君死難。文武諸臣。給賜褒錄。誠天王明聖。扶植綱常。激發忠孝之大關也。其殉難諸臣。如原任大學士范景文等二十四員。業經部臣屢核真確。盡忠死節是實。然中分四保。以上十五員。列名題請。奉旨褒卹。欽遵在案。其中原任刑部侍郎郎孟兆祥。並子進士孟章明。大理寺卿凌義渠。太僕寺寺丞申佳允。御史陳純德。文選司員外許直。惠安伯張慶臻。新樂侯劉文炳。宣城伯衛時春等九員。皆以真實。不及四保。未與臣覽諸臣死難實蹟。或父子同盡。或闔門自焚。較之范景文等。尤爲烈烈。其保奏不及四上者。非各衙門見有參差。多緣已經核實。未敢盡疏扶同。竟以三保未沾恩數。伏念皇上愍卹仁恩。特宣天語。詢錄幽忠。在部臣其難其慎。察核再三。以仰副皇上闡揚至意。徵猷聖德。傳之史冊。永世無窮。而獨使孟兆祥等殉君死難。屢經部核。幽節旣著。卹典見遺。恐諸臣伏處九原。未得與十五人並留金石。揆之我皇上愍卹初心。當亦有惻然不忍者矣。伏乞勅部准行續錄。則一代大典。傳信無遺。華然之光。垂於百世矣。緣係云云。

奉聖旨。禮部知道。

工科給事中臣張王治題。爲仰遵明旨。推廣褒忠。敬陳未卹諸臣。懇乞一併勅部議卹。以普皇仁事。

臣見同科副理事官臣陳秉彝爲直陳聞見等事一疏奉聖旨但察殉難情真何拘三保四保許直著確查議奏該部知道欽此臣跪讀之餘仰見皇上褒忠闡幽超軼三代秉彝之所請者止一許直而皇上之所推恩者不止一許直也在部臣慎重大典亦止論保之多少初未別其死之真僞死果真矣何論保乎有保足矣何論三保四保乎彼諸臣者生氣雖存其骨已朽聞其子孫或若敖之祀或葛衣行乞假令死果不真誰敢冒欺罔之辜諛此既冷之魄諸臣中除許直已奉明旨確查外如孟兆祥同其子孟章明凌義渠申佳允陳純德張慶臻劉文炳衛時春等八員或父子相勸而死或與妻妾飲泣而死或燬其著述而死或闔門自焚而死皆昭然耳目毫無假僞儻不能與四保之范景文等共沐洪恩又不能與續請之許直並邀察議似與皇上但察殉難情真何拘三保四保之明綸終有未確據實再陳


兵科都給事中臣魏裔介謹題爲殉難事同一例孤臣獨未蒙褒仰祈勅部再察准與卹典以錄遺忠以助風化事臣聞忠臣孝子乃日星河嶽之間氣所生也有忠臣孝子則有人倫有人倫則天地賴以不壞故事關道義名節善無微而不揚明主褒之史官紀之言官陳之凡以激勵一代之士氣人心非徒使既沒之幽魂懷懷生色於九原也我皇上於順治九年十一月內特發上傳著禮部會同院部等衙門詳訪確察明末死節職名如范景文等十五員孟兆祥等八員先後俱蒙褒卹於以扶植綱常真昭示萬古之懿典哉諸臣爲不死矣惟是死難情真而未經褒錄者獨遺太僕寺寺丞

申佳允一人臣竊傷之。夫佳允之死也。在甲申三月十九日。而其投井也。則於京師之王公廠。昭昭在人耳目間。豈可假哉。查禮部覆疏。原因太僕寺順天府保送投井身死。而侍讀學士王崇簡之疏。大理寺之保。俱稱縊死。互相參差。是以置之無庸。再議。然佳允係太僕之官。而順天府有地方之任。則其察核。最真最確無疑。未可以自縊之參差。遂使忠魂烈節。鬱鬱於寒泉之下也。伏乞皇上勅下該部。再加察訪。一體褒卹。如以太僕寺順天府與臣所保。俱爲未確。則宜行之直隸督撫學院處。再加察訪。然廣平禮義之鄉。其士大夫相與尸祝。而讚誄之者。則已久矣。臣見皇上昨諭內院。纂修順治大訓。凡忠臣孝子賢人烈女。俱命殫思博採。故敢補牘再陳。儻孤臣姓字。不致淹沒無聞。邀一視之曠典。列法戒之新編。於以表忠勵俗。亦裨益風化之一端也。云云。

奉旨。禮部議奏。

禮部題爲殉難事同一例。孤臣獨未蒙褒。仰祈敕部再察。准與卹典。以錄遺忠。以助風化事。祠祭司案呈先該本部題覆兵科都魏裔介題前事。奉旨依後議。魏裔介奏。係三月初十日奉旨。爲何至今始覆。本內滿字。魏裔介具奏。奉旨日期。又未寫著明白。回奏。欽此。除臣等遵旨回話外。隨於順治十二年八月十六日。行文直隸督撫學院。詳察申佳允死難緣由。去後。又於十月二十三日。行催。今於十一月十二日。准直隸總督李蔭祖咨開。看得永年縣鄉官。原任太僕寺寺丞申佳允。守義殉難。捐軀允宜褒卹。祇緣行察之異。是以久未蒙恩。茲據道府確查。申佳允。委係於三月十九日。衣冠北叩。

投在王公廠井內身死。及察巡撫董天機咨文。並學院程芳朝咨呈內開。道府相同。並無異詞。等因到部。該臣等議得。申佳允當日死節事迹。部院衙門保送參差。未得與卹。今既經直隸督撫等院詳察。當日申佳允死節實迹。委係三月十九日。投井盡節身死。應照范景文等例。一體旌表。奉旨依議。祭田帖文直隸廣平府永年縣。爲欽奉上傳事。蒙戶部咨云。該縣速撥官地十日。每日計地七畝。給殉難申宦家。以作春秋之祭。以昭皇恩嘉卹忠魂至意。該永年縣知縣余維樞。查本縣並無官地。二十八社老人等願輸價買給。蒙撫院董批允。如議施行。今買得府城西南張寨村生員張華然地七十畝。每畝價銀七兩。共銀四百九十兩。俱係二十八社人等。公同捐資。已經丈量交割明白。除申報達部外。卽日撥與申宦家收管耕種。以作春秋致祭之用。申氏子孫不得擅自典賣撥換。若有勢豪強占。或用價私買者。以背旨論。依律治罪。仍將原地追還本主。其七十畝錢糧。世世照優免例。里社不得妄行攀派差徭。永遠遵守。以昭皇恩於無既。爲此帖付申宦子孫。查照帖文事理。遵守奉行。須至帖者。



申端愍公文集卷一

奏議

明 永年申佳胤著

詳陳先著第一議

吏部文選清吏司主事臣申佳胤奏。爲詳陳先著第一議事。臣疏陳辦賊有急著。有勝著。有先著。而此時最急無如用人。先著卽急著也。制勝惟在儲將。先著卽勝著也。其一曰以諮訪銓司之法。諮訪樞屬。請詳其議。按吏部司官缺出。本部發諮訪單於九卿科道。公舉中行推知才品卓越者。繳單到部。再加確覈。開列正陪。恭候欽點。蓋不啻其難其慎。務得真才而用之也。兵部四司官銓除之法。何獨不然。臣願皇上勅下該部。自今以往。宜照臣部司官例。幾北一人。幾南一人。江北一人。江南一人。山東等十三省。各一二人。每遇缺出。該部發單諮訪。令九卿科道。公舉其雄才大略。曉暢兵機。或敷歷邊方。或曾辦虜寇。英敏甲科。功績顯著者。繳單兵部。移會臣部。列名上請。異日開府建牙。皆從此出。英才濟濟。何事旁求。臣所謂預儲節鉞之選者。此也。伏乞皇上勅部議覆施行。

詳陳先著第二議

吏部文選清吏司主事申佳胤奏。爲詳陳先著第二議事。臣疏陳先著第二款曰。以薦舉邊才之法。薦舉

將才。請詳其議。前者廷臣薦舉邊才。累牘連篇。滿紙誇翹。若人人韓范。在在孫吳也。及敵至茫然。致興乏才之歎。臣謂文吏作邊才。畢竟非衝鋒陷陣之料也。禦敵之事。全在得將。將將之要。全在選才。臣願皇上勅下廷臣。宜炤薦舉邊才例。各舉將才。或同桑梓。或係宦遊。或得之傳聞。或得之目見。各舉武弁中之膽略超羣。伎勇絕倫者。彙送兵部堂上官。同職方司。兵科給事中。公同確覈不堪者。卽行糾駁。以應禦侮之需。以備登壇之選。異日邊疆有警。卽可按冊而求。較之白面書生。空談兵事者。不判若霄壤哉。臣所謂專責衝鋒之效者。此也。伏乞皇上勅部議覆施行。

詳陳先著第三議

吏部文選清吏司主事申佳允奏。爲詳陳先著第三議事。臣疏陳先著第三款曰。以保舉守令之法。保舉守把。請詳其議。按保舉守令之法。臣部已奉行矣。近日奉旨。裁置募練。裁通判。置守備。裁州判主簿。置把總。有一番更置。定有一番功效。但守把之官。專司練兵。豈容市井無賴之人。聊以充數乎。臣願皇上勅下兵部。宜炤保舉守令例。令各將領。各舉所知。不拘資格。不拘廢弁。或精於火器。或熟於騎射。或驍勇善戰。或足智曉兵。某堪守備。某堪把總。各舉一二人。卽將實蹟開款。彙送兵部堂上官。同職方武選司官。公同考驗。果堪實用者。請旨填補。不堪者。卽行駁回。仍連坐舉主。兵科都給事中。年終舉劾。以示勸懲。將見冤置之彥。盡入網羅。臣所謂用備干城之求者。此也。伏乞皇上勅部議覆施行。

詳陳先著第四議